

AKASHVANI AIZAWL

REGIONAL NEWS BULLETIN

HEADLINES (MORNING)

1. Home Minister Pu K. Sapdanga hoin Kawnpui leh Sairang inkar kawng (NH-6) chu ngawrh leh zual zawka siam dan tur ruahman a ni.
2. Nimin chhun dar 12 vel a Bairabi bul Tlawng lui PWD kai a tlahlum, Vanlalpeka (kum 12), Bairabi North Rimawi Veng ruang chu a tlakna bul lawkah nimin tlai dar 4:30 khan hmuh a ni a, a ruang hi nizan khan lumen a ni.
3. India rama kut hna thawktute tuamhlawmna scheme pui ber – Pradhan Mantri Kisan Samman Nidhi (PM-KISAN) scheme hnuaia beneficiary-te hnenah tanpuina pawisa (installment 20-na) chu nimin khan sem chhuah a ni.
4. Union Minister of Fisheries and Animal Husbandry Rajiv Ranjan Singh chuan nimin khan Kolkata-a programme buatsaihah India chu sangha tharchhuah lamah khawvela pahnihna a ni tih a sawi.



KAWNPUI-SAIRANG ROAD MAINTENANCE

Home Minister Pu K. Sapdanga hoin Kawnpui leh Sairang inkar kawng (NH-6) chu ngawrh leh zual zawka siam dan tur ruahman a ni a. August 4-9 chhungin ngawrh lehzuala kawng siam hna hi thawh tum a niin, he ni 5 chhung hian PWD leh NHIDCL ten an tha zawng zawng hmangin kawng siam hna an thawk ang.

Nimin khan Pu K. Sapdanga hian Sairang - Khamrang - Kawnpui inkar kawng (NH-6) siamthat hna kalpui mek chu a hmunah kalin a endik a. Lirthei tangkhang mekte chu Mizoram Police ruahmanna hnuaiah vawiinah chhuahtir vek tur niin, ke 14 nei (14-wheeler) chin chunglam erawh chu tlan phal a ni rih lo ang a, an bungraw phurh pawimawh leh hmanhmawhthlak chu truck te zawka transit tur a hrilh an ni. Thawhtanni atanga Nilaini (August 4-6) inkarah phei chuan lirthei eng chi mah tlan phal a ni dawn lo a, hetih chhung hian 407 chin hnuailem tan tlang kawngah (Kawnpui-Serkhan-Durtlang road) tlan theih a ni ang. Lirthei chet vel dan hi Aizawl leh Kolasib Traffic Police ten an vil dawn a; MLA Pu TBC Lalvenchunga chuan Single Point of Contact niin kawng siam hna hi a vil zui dawn bawk.

Kawnpui, Khamrang, Mualkhang leh Sairang YMA ten hnatlangin kawng siam hna hi an thawhpui dawn bawk. Minister chuan hnatlanga thawk chhuakte chu lawmman pek an nih tur thu a sawi bawk a ni.

Puan tawh angin, Lirtheia Eizawng Pawl hrang hrang 22 inzawmkhawm chuan Mizoram chak lakluhna kawngpui pawimawh a rang thei ang bera siamthat a nih theih nan naktuk August ni 4 atanga ni 9 inkar chhung 'Lirthei Tlan Chawlh' an puan dawn thu an lo sawi tawh a.

Lirtheia Eizawng Pawl hrang hrang Chief Convener Pu Robert Lalrinawma chuan Sairang - Vairengte (NH 306/06) inkar Khamrang kawngah lirthei tangkhang a tam avang leh kawng siamtuten hnathawh a ti buai ni-a an sawi bawk avangin 'Tlan Chawlh' puan an rel ta tih a sawi a ni. Hemi hun chhung hian sorkar chu hma la turin an phut tih an sawi a ni.

<><><>

BLOOD DONATION

Mizoram Gorkha Youth Association (Central) chuan nimin khan Gorkha School Complex Khalta-ah an pawl dinna champhaphak vawi 49-na lawm nan - Blood Donation Drive an buatsaih a. Aizawl veng hrang hrang a MGYA member Gorkha thalai (mipa 74 leh hmeichhia 2) ten thisen unit 76 an pe a ni. Thisen unit 76 hi Blood Bank, Civil Hospital, Aizawl a mamawh tute hman atan a pe a ni.

Byte: Anup Chhetri President

Nimin vek khan Kolasib Diakkawn Branch KTP member-te chuan a mamawh apiangte hman atan Kolasib District Hospital Blood Centre-a dah turin thisen Unit 22 an pe a, thisen petute hi mipa 19 leh hmeichhia 3 an ni. Thisen hi Kolasib District Hospital Blood Centre a thawktuten Diakkawn Kohhran Diamond Jubilee Hall-ah an laksak a ni.

<><><>

SESSION

Mizoram Larsap General (Retd) Vijay Kumar Singh chuan 9th Mizoram Legislative Assembly thutkhawm vawi 5-na chu tun thla August ni 27, Nilaini chawhma dar 10:30 atanga neih tan turin a ko. Session neih tur thu hi nimin khan Mizoram sorkar chuan thuchhuah siamin an tarlang a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

ACCIDENT

Nimin chhun dar 12 vel a Bairabi bul Tlawng lui PWD kai a tlahlum, Vanlalpeka (kum 12), Bairabi North Rimawi Veng ruang chu a tlakna bul lawkah nimin tlai dar 4:30 khan hmuh a ni a, a ruang hi nizan khan lumen a ni.

Tarlan tawh angin tui tla Vanlalpeka hi a nau Lalrinchhana leh an thian pakhat (an vaiin mipa naupang pathum) nen Tlawng Luiah hian an cheng a, Vanlalpeka leh a nau hi Tuiah hian chesual in an tla a, Vanlalpeka nau Lalrinchhana hi vanneihtlak

takin Chakma hnathawka ram riak tur, Lawngleng a in-kar ten an chhan hman a, Vanlalpeka erawh hi chu an chhan hman ta lo a ni.

Vanlalpeka te unau hi Aizawl a cheng thin; tunhnaia Bairabi a an chhungte bula cheng an ni a, a ruang hi a pi Pi Kapzami, Bairabi North Rimawi Vengah lak a ni a, vawiin chhun dar 12 hian vui a ni ang.



PM-KISAN

India rama kut hna thawktute tuamhlawmna scheme pui ber – Pradhan Mantri Kisan Samman Nidhi (PM-KISAN) scheme hnuaia beneficiary-te hnenah tanpuina pawisa (installment 20-na) chu nimin khan sem chhuah a ni.

Prime Minister Pu Narendra Modi chuan Uttar Pradesh-a Varanasi atangin India ram puma kut hna thawktu vaibelchhe 9.7 chuang hnenah Rs 2,000/- theuh, a vaiin cheng vaibelchhe 20,500 chu Direct Benefit Transfer (DBT)-in a sem chhuak a. He hun hi Lunglei District atangin District Agriculture Officer Pu VL Hmangaihchhunga kaihhruaiin Agriculture & Farmers Welfare Department-a thawktute leh kut hna thawktu mi 120 chuang kal khawmin biakhmuhtheihna kal tlangin an chhim.

Lunglei District-ah PM-KISAN-a inziak lut mi 21,434 awmin, inziak lut zingah hian KYC leh Aadhaar fel lo bakah, an chin hriat tawh loh eng emaw zat an awm a. 20th installment dawng thei tur hi mi 15,730 niin, tun tuma sum pek chhuah hi kum 2025–2026-a installment vawi khatna a ni.

August ni 1–8, 2025 chhunga 'Aakanksha Haat' buatsaih mekah Lunglei Saikuti Hall hnuai (Ground Floor)-a Agriculture Department stall-ah PM-KISAN counter hawn niin, harsatna hrang hrang vanga pawisa dawng lo leh hriat chian duh neite tan dawr theih reng an ni.

